

思貽堂書齋



思貽堂書簡卷六

上文式巖方伯

卽日奉手函以本年舉行計典飭將所屬各員無論實任署事分別賢否填具切實考語密摺實呈仰見憲台澄敍官方升明退闇之至意下懷可勝欽悚竊惟人之質性萬有不同觀人而用之自古皆以爲不易而要之陽剛者爲君子陰柔者爲小人此理之決不可易者也某竊謂今日人才遠不逮古其原實由於無學降格以求自當先衡量於氣節之閒庶優劣才否可以得其大概如其人光

卷六

一

明伉爽一意孤行落落然不以人世閒之謗譽升沈爲榮辱者處必誼士出必良臣如其人依附隱伏營營瑣瑣巧探意旨工於塗飾者處必敗俗出必蠹民永州入州縣屬吏共四十餘員就地論才堪以保擢者僅二人衰疲庸劣不稱職者凡五人其餘各官有久任而未聞其有過失者有試以一二事尙屬可用者有到任未久者逐加察看遵諭一併開載事實分註考語另摺封固專賞聽候酌奪施行

又



自去冬江口叩別後依戀之私未嘗少去諸懷嗣  
聞歲尾抵襄陽上元後始獲就道而兵警遙傳倍  
深馳念此書到日計早已安抵鳳城矣軍興十餘  
載海內慘黷財力困敝非其人勤明忠實兼有公  
才公望者正未易埽除錮習而整理之衮衮人海  
中舍執事其誰屬哉某一無學識又以負性剛拙  
難與時合動輒乖迕而執事獎勵勤勤不啻口出  
循分揣涯竊以爲不無溢美生平遨遊師友閒中  
歲惟文文端公恩小山師知賞最深恩遇最厚南  
來則程晴峯總制爲能不徇眾論特邀薦拂而以

卷六

二

揆之執事相待之殷相望之切真摯有加優渥亦  
復遠甚小人懷惠何日忘之今者年六十矣髣髴  
雖白而精力未衰處此時艱曷敢自愛閑逸無如  
刻意孤行不改常度實爲流俗人所憎忌心意不  
同如火與金豈能低首厚顏隨行逐隊以取辱哉  
故數月以來埽卻踰伏無復衙趨守分耐貧以求  
中無愧怍藉報知我已耳湘中大局日以頽決恣  
意剋削遂至應以不肖之心李巡檢控案如何彌  
飾而猶復不悛正恐易口自毀貸手自毆其狡報  
更倍於已事也

兄子教銘

二月往權桂陽縣居崇

巖峻嶺閒界毘豫粵近日江浙逸賊竄擾廣信建  
昌邊防頗急已切諭其妥辦矣夙蒙眷注謹以埴  
聞瀕行時面陳眼花手顫不能繕楮又苦修啓無  
人杞山來略抒積忱不自己已草書忽忽千萬原  
宥伏惟爲國崇護玉體不宣

覆翟錫三中丞

月前差赴朗州獲侍鈞顏藉慰積悃仰蒙略雲泥  
之分道故言懽教誨飲食有加無已叩辭復拜寵  
賜不敢固卻感荷之私匪言可罄抵長沙後因代  
局未了之件亟須逐一清理兼之酬接罕暇脩啓

卷六

三

無人迄未申謝舊僕劉順回郡諭令祇稟壹是茲  
乃朵雲下逮情旨殷肫不惟不以踈慢見責仍縷  
示近日邊情並悉勛候多綏可勝欣悚竊謂我公  
十載算城民苗佩畏數千里有安堵之樂三軍無  
委粟遺芻之嘆當時陰受庥庇初不之知今乃遽  
至於此曲突徙薪厥功甚偉而截截諠言妄云無  
事者當亦自悔其爲夢囂語也某朔日銷差始知  
有飭辦常郡防堵之札當卽以常德地勢只宜進  
剿不宜拘守並以周軍門忠勇可恃駱參將熟練  
營伍一一上聞均辱嘉納刻下賊踪所至究竟何

方差探云云似未確實此番蹂躪至十餘廳縣之多統軍者似不能辭其咎也請安謝恩摺式切囑胡少尉專呈計已登覽行臺省近無新事惟餽饌支絀捐輸釐金較昔歲短少耳青陽開動增福益壽

又

涪陽于役幸獲載侍鈞顏伏見玉體康強不勝欣抃午筵醉飽分闕情絲歸塗又荷寵招祇以畏暑遙行恃愛方命且感且悚比毒熱遠惟因時納祐良深馳慰某於十二日抵長沙十三日趨謁大府

卷六

四

勘議之件均蒙如請飭辦此事錮蔽五十年邇來贓罰累累將成鉅案惟有因利而利弛禁宜民非徒轆轤可一掃而清而吳族數百戶衣食有資尤足宣布聖德正不敢避腥羶之嫌依人學語致誤公家事也省門近無新事惟無雨以致米價日騰寶永一路旱亦同之似聞常澧乃苦澇近復何如散勇最可虞有年或可稍安匪私憂過計也草書不莊千萬涵宥

與丁稚璜宮保

承手書久未裁復嗣聞宋逆景詩勢甚兇熾足下

部曲無多小有挫損極爲憂悶頃知連獲大捷山  
左靜謐無事甚慰甚慰恩慈湔拭朝寄益隆定符  
頌禱未審旌麾已回濟南否昨衣農過我悉侍奉  
東來暑短程長諄諄至再計新歲始可抵官所也  
兄四月初卽奉調撤邦靡有定士民其瘵舍爾介  
狄維予胥忌古詩人所爲咨嗟詠歎而不容已者  
不圖吾身親歷之而有味乎其言也若云檢料吏  
務觸違意旨誠無可辭然崇國體輯人心自信一  
無過差今竟如何是尙可與言哉故自衡州回航  
後閉門屏迹罕與人接無復徇參緘口忍心不願  
與聞當世之事困約自甘讀書消日儻山資有藉  
早遁深密矣明年六十雖筋力未衰而剛簡性成  
不能諧俗低顏下心苟榮詭得實非所堪耳翹盼  
故人崎嶇騁力載廓重氛建節揚旌功業恢博白  
頭老兄乘興而來坐碧油幙中縷縷話湘中舊事  
豈不樂甚天寒爲國珍護不盡所懷

又

別十一年矣衣農東來曾手奏一書去衡州情事  
略約言之決意卻掃匿迹安貧不更作用世之想  
矣嗣聞天褒勤勞恩予節鉞疏簡不及緘賀久之

復聞懋著奇勳震鑠海內人所不敢爲不能爲而竟毅然爲之古所謂熊羆之士不二心之臣非執事其孰屬哉居常與朋輩言執事行事安定性質貞摯與之處初若甚淡漠者然及值疑難時一切利害禍福皆所不顧信然非私相推許也今天下兵事漸息小醜未靖特癘疥耳而國體褻矣民生困甚愚謂當力求根本先其大者搜舉循良劬農興學整俗移風裕民財定民志使之驩然有樂生之心勃然皆知報主親上庶德威丕振伏禍潛消國脈緜延昇平復覩若召集賈豎遊民黷武費財

卷六

六

專意刑殺致患氣日積亂端逾多非計之得也年來自湘而鄂而皖而大江左右見縉紳先生皆汲汲以儲勇防患爲第一義藏富于民化莠爲良以其說爲迂闊不可行老衰殊不解耳執事巍然負中外之望許謨遠猶亦旣爲百寮所則倣萬姓所稱誦矣伏望以郭李韓范之鴻伐兼有丙魏姚宋之大業爲我朝中興第一流人物顯德匡時何多讓焉文琛今年六十有八歲矣自分屯蹇早甘收拙乙丑夏篠帥來撫湘強抑再出己巳秋閒僑永乞病溪山夙契聊嬉頽齡而昨夏突委造舟先期

詳奏辭之末由謬采虛聲不諒人只愁水愁風往  
返萬里雇役遷延焦勞催促今甫抵任城節迫霜  
降不審張秋無阻滯否如能爲我布畫俾今冬得  
達津門感銘靡既咫尺東藩官事四拘不獲拜揖  
鈴閣暢申故人情話可勝悵惘眼花多年不作楷  
字久要不忘草書欵斜知不誣也爲國崇護玉體  
集祐受祉以禱以頌

又

昨拜讀賜覆敦舊憫勞殷殷款款詞旨切至感愧  
良深承鬢髮已白乍見恐不相識五十始衰顏狀

卷六

七

便非少壯况執事身任重寄正值亶事孔棘之秋  
性行忠勤與他人輕緩風流歡宴鈴閣者迴殊此  
無足異伏惟若時珍攝爲國謀練宏濟艱難爲望  
文琛抵任城卽遣人探水正憂淺澁且喜十五日

夜雨達旦驟漲二尺許隨嚴催舵水前進二十日  
泊安山閘漕路久淤須繞湖指西南而走詎湖水  
亦漸消縮深不及尺者二處百五十船更番背負  
始能去淺入深及至戴家廟大河縱橫渾渾泡泡  
逆流固甚奔騰順流亦極湍悍計日行不過一二  
十里今幸到八里廟矣臨河有壩壩內止水可五

尺餘悉爲江北回空糧艘而築由此赴臨清聞蓄  
水壩尚有九所只得設法拖壩竭力趲程如蘇船  
尙未齊集卽當先行趕往如已啣尾而來彼此分  
行兩可無誤關健全在臨清千懇飛札郭刺史或  
少緩開壩俾得北上以糧撥需水才一尺蘇船倍  
之節節艱阻冬無大雨似本年難以歸次但入運  
形勢文琛尙未親歷畢竟有無滯碍能否浮送未  
由懸揣應如何料理爲我籌維少梅刺史當有權  
衡耳津剝闕額一千頻奉李爵帥函札催促必當  
刻日送津交納便運新漕天倉要需不敢稽延以  
重所職非徒爲早謝此肩計也知必邀鑒及手奏  
冒瀆不勝禱切

又

荆門閘舟次材官來奉手書並賜多珍卻之不恭  
謹以拜領久要不忘白頭如舊此古人風義今世  
所希何勝敬佩惟一無桃李之報且感且悚承夜  
寐不熟此自是心血耗損猶記文琛永守州籌防

勦時亦曾患此得經驗方早晚嚼龍眼肉每十五

枚遂漸痊可試服之當有效也整頓乾坤亟需材

傑伏望因時珍攝福壽康強豈惟私禱文琛誤諾

此役日深愁切自分渡黃入運早已逾期今幸可  
年內抵津又復阻滯公牘所陳皆確切情事江北  
諸委亦知安山等處頃已淺涸空船未能歸次守  
壩員弁亦復云然其必趕辦者不過希事竣優敘  
耳天時地勢非人力所能勉強試縷縷問之亦必  
茫無把握也文琛非敢不欲施人良以遙送漕轉  
要需所處又多棘手豈坐待徒然兩誤於彼亦  
絕無裨益避嫌避怨媿要決實心辦公家事者  
必不如此辱知有年亮邀鑒及

覆溫味秋學使

卷六

九

芳宇太守來辱惠書猥荷藻飾悚切悚切尊甫比  
部公詩集讀再四纏綿斐亶風雅之遺決可傳後  
古文義法文琛未嘗究心遵屬草就序言別紙抄  
呈尙乞削定如遽付之手民實不無佛頭着糞之  
譏也承還朝在初冬計必新使者來與之交割方  
可啓節文琛年力已漸衰辱自知不足見用於世

懇祈休退未蒙上台允准擬前十月望後一來長  
沙如能成行當敬詣拜送代承十有九月兒輩私  
輯各件居然寸許屈生竟鉞之於板茲並封寄指  
摘疵謬爲荷久不能作楷草書匆匆千萬涵鑒秋

深乍寒伏惟若時珍護尊候綏吉

又

力回州辱手書猥蒙藻飾慚悚承以扇命書  
近作因敬成一章奉送還朝不作楷已三十年勉  
爲之醜拙無似詩尤不佳聊以寫仰企之私而致  
頌禱之切不足當大雅哂覽也前擬望後赴長沙  
道州突來警報郡城頗形蒼黃是以未卽成行邇  
無故驚擾文武又紛紛攻辯實可一矇正未知如  
何了結後十月仍當買舟而去爲避囂計正恐水  
淺灘枯費時逾日不獲恭詣拜送展轉託司察入

爲荷翹首星軺何勝攀戀

卷六

十

上李督部

王舟之役猥蒙今撫部諄切相囑檄調頻仍莫非  
王事未敢遑息惟六十外人大懼精力衰頹無以  
副其所職昨荷賜荅乃獎以精心妙用悚愧尤深  
茲聞麾幢南來亟欲遠迓肅謁少慰六年來睽違  
想慕之忱而廠工尙虧十之一二未克抽身日來  
督造巡催刻期了當卽馳詣長沙叩祈教誨俾有  
遵循謹此坳陳伏惟崇察

與李仲雲都轉

來邵州忽週一月矣忙忙碌碌日無暇晷體倦神  
疲畢竟干我甚事每思芋園召飲酒半倚方亭水  
檻看足下以餅餌餉魚恍然有悟信人世閒無處  
不可觀道偶然散遣便覺人適其性物遂其欲怡  
然暢然天地清夷此中絕無些子翳障而乃墮溷  
塵俗心爲物役此奚爲者殊自哂也比當朱序園  
林清娛體興安勝輔堂病目愈否甚念甚念某奉  
委查辦之件粗已料理蔭兄備聞之明日去永州  
矣山程毒熱老瘦禁當幸能涼風吹袖微雨灑塵  
是行人所虔祈而不可必得者也貞兄有歸期未

想在秋風後耳手報並謝

卷六

十一

與杜鶴田太守

正月得小農子宣兩明府書告以有修志之役而  
未明言其何所蕪淺衰孱力難勝任已約陳其概  
乞婉達方伯旋奉手教始知邵人將有此舉而亦  
未悉其由來也二月曾生壽麟來永具述殷諄且  
云台司已諾所請某仍以前說縷縷謝之曾生延  
畱五日之久情辭益切無已屬其慎選縣中能文  
有志識者五七人分門編輯草藁成時某不避僭  
妄爲之參討而潤澤之益山水人物非生長其閒

者不能得其實其他則博採旁搜援引疏證體必  
謹嚴辭必醇古事必瞻覈蒼眾長以歸於一是歲  
鍛月鑽或可期其妥善耳昨甫奉督催之札邵人  
已專力持緘強問行期義不可虛辱而事又不能  
中止惟痰癥初痊可右臂忽痛楚幾於不堪把筆  
作字夙患風癱復發抑搔無時兼之親課小兒禮  
經急切難以卒業遂詳復王潤生諸君約於四月  
中泮由湘潭陸路來練日開局酌核款例文琛尙  
有面瀆方伯之件擬於此月抄舟赴長沙遲滯之  
因衙參日希代呈一切爲荷前辱賜函謙尊而光  
獎許逾分赧悚赧悚登齋侍教再申謝也春寒多  
雨體候何似伏惟爲國爲民若時珍護

又

去邵州十有八年此日經過非復從前景象矣所  
幸者物力雖彫瘁而人心仍樸拙耳委件粗爲了  
訖中有無數曲折諸多礙難鄙意決以調民氣整  
民俗爲主久當知之方伯有另稟如能俯採芻蕘  
竟勒令奸商禹姓不再貿邵或嚴札驅逐不加深  
究則惠邵人者旣深卽保全無知之勢紳亦復不  
小餘皆可暫安無事晉見或當語及此也頗記憲

廟時李又玠中丞撫浙中公廨落成屬官乞張楹  
聯羣知中丞疎略文字必當假手乃中丞亟呼材  
官伸紙命一能書者磨墨濡毫以俟徐徐曰有本  
事能辦事辦出事來有本事沒本事好生事生出  
事來沒本事屬官皆爲愕然百餘年來杭州父老  
猶傳述以爲官箴嗚呼居今日而欲求如國初盛  
時之能辦事者不可得卽求如爾時之好生事者  
亦且不可得大都尸位偷安營私肥己誰復肯爲  
君國一盡心力世局滔滔將何由復振邪可憂也  
足下守寶無箴日去思嘖嘖在人口屢見小委陶

卷六

十三

崇禮陳洽輩爲言虛懷下問勤求民瘼其所設施  
綽有循良規範甚佩甚佩某明日去永州矣志局  
已開擬十綱四十九目屬同人編纂有草稿寄往  
僭加削定不久居此徒耗日月也匆匆奉報衙齋  
召集飽德至今並謝朱暑伏惟珍衛

又

不奉書問三月餘矣文鄉試已竣事卽日又當舉  
行武科勞勩知鮮暇晷深秋不雨晝熱宵涼頗難  
調護尊候何似實深縈念哥匪蠢動我軍紮蓮花  
寨而鳳凰山是其老巢一接小仗例報大捷比探

知其軍火不備未受懲創已潛散由萍鄉將去萬載合隊變遲禍大此湘中大患甚可慮也愚以爲用兵如治病何臟何腑當投以對症之藥如病耳而治目病手而治足病泄瀉而仍服硝黃病嘔吐而仍進以瓜蒂藜蘆鮮有不劇且敗者然今日之事以藥治病不如以病治病病卽藥也高手必能見及此放膽放手決可療救此閒八月已微有消息道州市一日買去白洋布七十餘端布爲之一空鋪戶奔告而州官固聞知知其事而畏怯者移居來郡城凡十數家昨報匪徒盡數以白布帕首

卷六

十四

信有徵矣此數日閒不審省門撤防否儻竟以爲宴安無事正恐疊起循生突難措置耳老衰料事十錯八九與足下書率意言之毋示他人至囑至囑有瀏陽劉孝廉人熙者中式丁卯第一頗能讀古書深知道義去歲主講春陵是以悉其爲人家貧不能入都但求一安研之方以供菽水足下幸噓拂而位置之此培養人才之盛德也某無力振之與他人言或不見信故脩乞足下耳附及希鑒

又

抵永寓已二十日時欲作書報輒以嬾廢又恐

涉及近事不無憤時嫉俗無端傳播必招人誚讓故不如其己也昨晚乃奉手翰感荷殷肫悚切悚切藉聞令問休暢體候綏佳尤慰承傳方伯諭以修造糧艘札調委辦此項工作寬長深部頒舊有式所用木植亦非一色慙赴常德購料召工設廠督修俗名糧撥子運河水淺澁以此轉運京東十三倉米石來函謂爲海運必燕書舉燭耳頗記道光二十四年張司馬迎煦曾奉委修其時司馬年七十餘耳聾又不良於行丁友弊混布畫未能周妥明年文琛兼權武陵爲之改革料理幸爾免累

卷六

十五

三十年易刺史學超則承修三百餘號工料旣不堅實合宜復值髮逆北竄遷延守候不能交納至今賠款尙有一萬八千餘兩此差領數雖多而支銷極繁猥檢料端緒殊勞心力造難送尤不易大凡外省與京部交涉多方挑剔借公逞私在在皆是誠爲湘中重大公件文琛日卽衰憊茲蒙憲注

不忍遺棄選擇而使獎勵逾恆兩奉飛催不敢違延殊恐駑駘非長坂之才樗櫟支大厦之用不免負負耳草草奉復餘俟謁方伯時敬領鈞示並舉鄙人所知者縷陳一切儻能謝肩實所深願且登

齋拜晤面受大教也

又

舟赴朗州闕爲面別恐煩從者非疏頑無禮也知

必鑒之

文琛

於月之三日已卸裝矣此閒習俗囂

浮四月龍陽之警商民紛紛避徙木客亦倉皇捆

紮縛把取道接港穿重湖北去近日始少復業探

悉鐵蔬油灰棕竹各物直亦更低昂不一事與疇

昔迴殊頗形棘手昨已示招工匠復示木牙傳諭

木商先儘船工購買不得詭詞他往設廠已相東

門外皇經閣下一俟工集料備親督排造開廠之

卷六

十六

期約遲十數日選吉興事生性迂拙步步必踏實

地未敢先時虛報也大約中冬可完備不致延誤

此役猥瑣異常極勞心力只以方伯獎拂殷拳感

無以報斷不沾沾徇己私有孤恩注但暮齒摧頽

不能不以羊公之鶴景升之牛刻自凜愬耳伏暑

遠惟動定多綏順序調攝

又

拜覆書深荷獎勉悚切悚切頃知有觀察五箴之

擢繡衣撫蠻指揮能事盤錯以別良器爲之欣躍

靡涯承校武已示期試畢始受代耶抑卽日赴新

官所邪彩鷄北來當敬迓塵幢於德山枉渚閒也  
文琛於昨月望已摺報開廠矣掘壕樹柵聚土築

墩扇爐安杵均已了當鐵蔬各物亦陸續買用尙

不致短缺惟桎木大二三尺圍者頗少雜木尤稀

舵柄例用檀高價求之才十之三四已遣人赴沅

靖採購足數此役艱棘至矣細碎極矣蠹弊多端

欲一一搜剔而杜之使絕誠如來諭變通辦理俾

後此有所依仿大恐力孱願奢未之能耳昨銘兒

家書來云祇謁時有何日赴常德之問銘兒粹無

以對文琛聞之亦茫乎不審其所由並聞方伯亦

以不稟請銘兒同行與仲京太守言之此絕非有

他也永州奉札曰銘兒蒙憲恩奏辦清查團防尙

未銷差五月抵行臺省略悉外間誹議方伯不候

撫批單銜逕委實屬異常恩眛文琛竊祿三十餘

年小人涇涇抱迂守拙從無以已私祈請長官之

事今皤然老矣不改其初而人事滔滔讒謗可憂

嫌疑尤宜不處若銘兒則自先伯子壯歲殂逝後

長養訓誨幸可成人其天性孝謹視余猶父平日

定省視聽閒刻刻以幾微不肯自凜故再權縣印

勉步廉能少有異於庸俗卽如咸豐初隨宦邊州

六載督練勇丁防剿得力駱宮保亦所聞知爾時式巖方伯函令開列保薦朱寅菴鎮軍再四爲言鐸兒堅不肯與厥後爲蔣湘泉中丞援粵拉行遲久始得一官其不苟進取如此此永之人皆知之非鄙人癖譽也擇人任使權自上操茲者常郡來否豈鐸兒所得自主文琛亦何敢妄涉干求尚肅手賀附致區區希賜亮察

又

月前珂玉過朗州匆匆接晤未能飲餞亦未及走送甚歉辱手教已履新敷政矣欣慰之至五尊在

卷六

十一

南楚極爲邊重苗情狡黠從前叛服靡常傅重安方伯乘傾巢斬酋軍威大震之後堅持均田之策但就現存鬢首僅足口食而又樹柵築堡興學設額以揚皇武而闡儒風陽似撫綏陰以蹙其生理不使種育益不啻草薶而禽獮之心毒手辣絕不自爲一身及其子孫計而其爲國家謀者固至深且遠也文琛初官湘中適值石觀保款案台司莫不嘖嘖歸咎以爲初辦過於嚴削患有由生爾時反復陳言然疑各半前人往行不易窺識未嘗不嘆奉公忘私毋忝於職守者時過境遷轉茲人以

口實大類如此東倒狂瀾誰有力挽風靡運衰豈  
眞天寶爲之哉我髮白矣歲異而月不同今未知  
相較更何如耳足下通明純篤冲挹納善必能因  
時討裁懋著勳緒爲鎮防之最文琛所事頃已得  
半亟欲了辦添廠鳩工勉力督率不敢憚勞第二  
批已登水三批四批子限報竣但冀天少雨雪或  
可於季冬月發船北去知注並縷縷往返萬里以  
一年爲期更爲後會知在何地念此殊爲惘然謹  
覆

覆王潤生廉訪弟

卷六

十九

力至得書勤勤以修志之役相屬暮齒荒蕪實不  
勝任二月初屋榭弟來示已約略與言之矣某自  
十五六歲來卽矢願讀書頗欲究天人之繁曠考  
古今治亂得失之迹不甘自同於儕俗旣壯備員  
京師時賢多相慕說逐聲射利率以是爲借途遂  
敢影鍵戶罕有交納冥心獨往常苦無師惟日手  
陳編尋求先達所著述以歸一是人事牽阻病體  
疲羸終茫乎未之有得及改官來湘中百責所叢  
此事遂廢猶私有所冀解轍北歸或可了此初願  
詎意咸豐五年間粵盜焚掠漢陽先世藏軸及手

所丹墨者與故廬同爲灰燼每一念及輒嘆人生  
術業之成否亦有天主之而不可以意計而力強  
也志者史體在昔周官小史掌之孟堅踵龍門之  
後因其八書創爲十志豈不以闡教示法自知其  
有不逮歟自是郡國州邑有所編纂皆以志名二  
千年來何處無之而卓絕可傳者寥寥無幾不兼  
三長皆爲苟作月前復潘錢兩大令函縱言及之  
非故爲高論也大抵體不能嚴謹詞未必醇古事  
不盡贍覈點染搖襞徒供泉蠹亦何怪其然哉今  
猥荷諸君期許義不可以堅辭請仍如與星槎所

卷六

二十

面商者務慎選邑中能文有志識者五七人分門  
奏筆生斯長斯聞見較確搜求亦易俟彙抄稿成  
某不避僭妄參核而刪潤之邵州令守州佐皆曾  
覲然承乏賤勉從事竊望此書之成行後傳世追  
步五泉對山以副譴諉卽日已奉方伯札擬月抄  
赴長沙呈明此閒經手之件無多畱延四月中旬  
由湘潭陸路來諏吉開局酌定條例藉以敘積年  
闕別之懷希吾弟徧致同事諸君暨李明府匆遽  
不能一一復也

阻米犯必當緝案但得首惡足矣不可縱更不可  
枉此我所兢兢者昨宴集甚鬯謝謝今日魏先生  
來極明爽所論亦正欲以量里爲綱而以山水都  
團橋梁各件爲目總敘正須筆力耳文字乃宇宙  
閒公物生平絕不敢私尤不敢自以爲是也並聞

又

昨小住數相見見必久坐密談足下純明樸厚迥  
邁尋常乃今知之較曩者爲益深也極慰悅卽日  
伏暑體力何似足下年才四十餘頭腦畏寒此決  
是陽虛自以早服麋鹿茸爲宜永州冬後尙易買

卷六

二十一

得當尙寄星槎計已去長沙應秋賦甚望切科目  
不足爲星槎重星槎獲雋科目乃重耳

某

回寓以

來終日閉目坐一竹榻罕與人酬接

鈞兒

手曲臺

禮讀十齡童子頗能問難偶與之疏解其精要者  
以消炎畫而已此閒事有所聞知否邇來官人多  
不堪舉動皆足召禍運會使之然耶滔滔皆是殊  
足憂也志局不時往過已編輯未魏矩老少梅虞  
臣弟摯民晉卿諸公不別紙希代致臨行諸荷殷  
拳坳謝侍奉萬福并此頌禱

又

初春得吾弟手書時方檢料糧艘啓塗事極瑣屑  
不皇作覆贛州之行星坨過常已備聞之契分深  
密未可虛辱其諄諄之意割情遠出卽藉以報頻  
年吾君寵渥之恩於義未爲不合惟慈闈康豫是  
所禱切廿年兵禍疲困極矣大局坐一貧字散勇  
不足慮窮民實可憂江右何似正恐萬方一概耳  
修輯縣志弟與星坨皆以事去不知摯民晉卿能  
提挈否兄復于役卽少梅諸君已有藁本亦只得  
暫爾停閣似聞潭州總局積年尙無端緒此舉信  
非可旦暮期也兄久甘屏伏忽檄令主此繁重耗  
精竭神及之後知殊大恚悔人數盈千皆以官錢  
雇募實屬烏合但有號令而無法度何由一切使  
之安妥今抵溢浦數日矣望望津門尙三千餘里  
但乞河水不涸早秋逾張秋而北平穩卸肩七十  
老翁決計乞休不再出矣蓬窗坐雨草草寄畚把  
晤何時思之黯然

覆郭筠仙中丞

卽日奉手教將以督辦省志坐局纂修相屬

文琛

素無學植兼之荒廢不克勝此湘中高才閎識實  
不乏人亦何爲近舍皇甫湜而遠求白居易也邵

陽修志去冬十二月潘錢兩明府專函告知當裁  
覆力辭今春二月曾生壽麟來永備述邵人殷殷  
之意曾懇台司已諾督催之札文琛仍未之許曾

生延畱日久堅持所請且云咸豐初元湘皋山長

編刊郡志已成適文琛權郡事以志見商嘗摘其

疏舛者與體例不協者以質湘翁深以爲然葺屬

彭曉杭利改未幾湘翁下世此事邵人至今識之

而文琛則久已忘之矣無己今夏始有邵州之行

因酌定十綱四十九目切語局中諸君依類搜輯

必義正而詞文事賅而體潔庶或傳世行遠爲一

卷六

二十三

代可存之書一俟草稿彙齊寄示妄爲刪定此正  
未知何日方卒業也若省志地廣物博視各州邑  
書以資採錄而州邑秉筆或不盡得其人較邵志  
殆不止難十倍矣曲轅散木不可以爲棟宇駑駘  
下駟不可以履巉巖力勝一匹雛而強使之扛鼎  
翹關幾何不有折脅絕臄之患敢違鈞命自知明  
也久不作楷草書不莊涵宥爲幸初秋仍熱尊候

綏吉

與葆芝岑弟

岳州舟次寄書不卜何日遞到兄抵武昌後與拘

固無異大段已詳致初翁想備聞之矣十八日飛札增調中有變端不知又何意見再四尋思鐵案如山雖踢翻鸚鵡恐未能化巉巖爲平地也吾弟促裝來萬不必疑懼惟須先遣丁賃屋一區以便棲止親供稿及初翁呈覆似宜一並擬就攜來皇孫蓮勺候老夷門丈夫生世閒非意相干勿足怪也然湘中大局此番折挫極矣兩門一勝遂至於此可勝長嘆把晤已卽一是珍重

又

芹白極肥美咸甯筍清脆而雋永黑白菜類烏金白而細膩過之大似金陵瓢兒菜鱗重半觔許樊口鱖恰值腹腴時此皆湘中所無者晚過我淺斟縱談共啖鄉味何如花月春宴圖并付去

復劉更生解元弟

卷六

二十四

卽日得手書聞有喪偶之戚妻服期衰禮以恩制自必稱情立文惟老親在堂務當傷痛有節毋違色養也道州不再來主講禮部試尙未能果行貧士無依須急覓一安研之方以供菽水屬爲擇地以處今之世幾見有求賢愛才者誠如來書所云惟僕淺計伏處茫茫塵海中寥落心交誰復知信

無已鶴田太守人尚誠篤姑寄一函試投之得否  
未可知也承問學云云求端於天天道高遠不如  
就平近切實處逐一體驗中庸一言可盡爲物不  
貳子朱子曰天卽理也最爲了當試以淺者言之  
天三百六十五度人實爲之天何嘗有是又何從  
以是示人而寒暑分至終古不忒自是理合如此  
蓋惟理可以兼氣與數耳足下以爲何如不另慰  
唁順時自愛

與郭晴峯秀才

年來用功何似生纔十五六歲人耳日月方長努

卷六

二十五

力精進未易測其所至也大約有志於學必讀經  
以窮理讀史以觀事沈潛反覆於四子五先生之  
書一一驗之於身省察克治之他日學成時決可  
有用若但埋首時文中偷腔竊氣縱使倖獲科第  
不過流俗人荒速之爲耳海門學使甚器生昨由  
長沙寄助膏火銀兩屬端足可收入有謝函卽送  
交僕權承今五年自問不堪報稱乞劾乞去台司  
總不允行比者邊報嚴急昕夕焦心鬢鬢飄蕭更  
增衰老矣知念並聞

與陳程初總兵

月前拜識英標良深忻慰惟匆匆行返未獲多領  
教益轉增歉仄比尊候多佳爲頌弟舟行凡九日  
抵朗州守風三晝夜託庇平善易哨官人極明練  
水勇皆勤幹足徵訓飭有方甚佩甚荷卽日相屋  
移居擇地開廠召匠購料興工俟有端緒再報台  
司知注謹此手布埶致謝私

與錢子宜大令

僕

自邵回永已二十餘日矣酷熱不一把筆作字故未奉報昨晚李星源專足遞到方伯批飭將石板沖之件與王紳體察情形斟酌妥善辦法稟候核示此自是黃委員未到省日批發也黃奉密委而來聞其甫到郡是夜小峯手燈走旅店相見次日徧城中已喧傳有開鑛之舉到縣書告硯臣派差前往護衛似甚畏怯者然老旦山冠亭嶺雷公坪新冲平冲鴨婆水石板冲各處竟未逐一履勘

卷七

一

匆匆而去誠所謂寶山空回者矣嵇大令見其稟稿意主封禁封禁已由鎮府稟咨又何待黃委言不爲福先不爲禍始此黃老之術正今日居官人不肖任事苟且藏身之妙訣委靡成風世局日以墮壞係心家國者斷不如此四月初僕在長沙與

足下偶談及此非屑屑以利言也黔東軍事不能中止欠餉已多後將莫繼勸捐斷難再行抽釐日見短少惟此則以天地無盡之藏供國家非常之用金人升人古且設官何爲不可且此間可辦約有數端與他處異新冲口乃王方伯自有之業充

公開採一也現已露面砂者四處已被偷挖者三處皆高巖穹谷中無田廬墳墓二也將來招募鑛丁以及夫勇卽可用王方伯舊部十年從事知其心意又皆粗足衣食不至聚易散難滋生事端三也此項工本由王方伯墊用毋庸先領庫欸鎔冶所出儘數批解充餉四也况康熙十九年滇吳逆命詔許衡永民開鑛輸稅以濟軍須二十三年仍准開免稅舊案可稽出奏確有援據所必當察實者惟在砂之旺不旺耳每百觔淨砂畢竟得銀若干兩黑鉛尙可得若干觔直不直一辦再作區處

卷七

二

至每一爐需若干人炭若干觔看火掌瓢抽風箱薪工月若干錢其挖掘挑運防守彈壓以及專司登記坐局稽查一切支銷能否就黑鉛價中了卻亦必通盤籌算如所得非巨款自合以作罷論此何如事未可躁率也昨月望前已與王方伯商之方伯出百金遣明妥親信人往桂陽州聘一認砂者并携一看火者來江華赴有砂各處望氣明白踩清砂路隨酌取砂各三五七石運來永城設爐試煉大約此月杪或八月初當可分曉是否可行爾時再縷縷稟覆乞足下代陳之爲禱朗卿方伯

家貲優裕乞養閑居實以叨被恩渥藉茲報効絕無希冀僕則年迫衰暮於名利兩字早已冰解雪

淡更無所圖亦以蒙朝廷豢養中外官四十年一

無裨補愧悚殊深茲仰荷方伯晤遇殷切但可盡

力者宜竭蹶爲之耿耿此衷天日共鑒抱迂守拙

誰其信我生平動遭疑謗况事涉腥羶更易鼓舌

搖唇乎非常之原黎民所懇創見之事難與慮始

眼中之人可不必深論也再批中有邵志成編卽

行回省銷差之諭僕何敢石心木腸再言休退特

省門大不易居歲非二千金不可此間但得三分

之一足可居貧食賤一生不敢累人尤不敢非道

非義妄有所取足下知我并希爲我婉達憲聽尤

感切

與姚藹亭通守

多年世好辱以長女公子字我堯孫竊不勝薦蘿

施松柏之愧匆匆去長沙不及薄具酒食少伸欸

洽尤悚尤悚比維體力輕安眷愛清吉爲慰某回

永寓後決以山水文字爲暮齒之娛不願墮塵澗

俗似聞方伯有調委承辦之件有鑒已往審擇而

然姑俟札到再定行止卑屈効官生平所恥老拙

不改此度也知念并及

### 與翟伯常大令

昨過棠壘深荷密款登舟復蒙遣僮從偕來行厨授食緘戢靡似比維體候多綏良用欣慰有家報去朗州懇代申尊甫中丞容暇專肅踐叩某即日已抵華容素性不慣舟楫狂風掀簸頗覺嘔惡幸布帆無恙殊自慶也竹虛松巖二君不審何時可來乞促令諳悉弓丈之林姓等早來爲荷許杞臺廣文面訂回署相助爲理伏望致意造速尤爲盼切此間事已再晤壽生明府粗聞顛末以封禁爲正辦次則升科而皆有所不便自當按畝納租就事了事能否如願俟有頭緒時再當函布局船極快極妥未敢久畱將來回岳時仍望借坐祈轉達香舫大令不另也東路軍情何似極懸念便示之卸裝匆遽手謝不盡百一

### 與朱烈先大令

惠書猥以生日尙縈記注別遠情至殆與湘水俱深矣且謝且謝比惟烈先世長明府仁政普施令問休暢爲慰開棚童試靜謐無喧尤慰尤慰僕自夏至今總苦痛瀉時作時止良由今年毒熱屋宇

低隘所致長沙無真醫者茫昧於脈亦並不識藥之性質氣味強以此糊其頤頰延與之語辨析陰陽未有超解靜言思之世事大類如此不獨衙推然也近日少可矣擬往鄉中相宅如可棲托卽當上書乞身耳亦知囊空無物歸閑非計而茫茫身世觸處可憂從此塞耳不聽掉頭不顧是非得喪均歸於無何有豈非延年養性之良方哉拊告足下應爲我拊掌也朱火告謝風物淒厲起居珍衛

與龔譜香明府

歲除前一日使至拜登永州土物四種並展讀惠

卷七

五

書款款深深意餘於言其獎飾鄙人處甚不敢當且慙且謝卽維體候多綏良用馳慰某一無知能性又簡拙不能隨時賢俯仰年來甘意屏伏自知明故自處審也方今大勢四顧同然將貪兵玩官苟民窮欲整齊而變動之大不易易古之仁聖賢人或宦達思歸或倦遊返駕豈忽然於君父倫紀之大自耽逸樂哉蓋皆有不安於心者而後出此耳比者猥蒙中丞眷遇諳屬再出報報衙趨聊復云爾浮雲太空絕無繫戀知我者必鑒及也新舊詩刊本二十卷非敢妄希傳後徒以生平志事大

略具此便坵去計已察入伏望公餘披覽摘瑕攻  
謬俾得聞過至荷至禱風雨春寒起居珍衛不盡  
百一

與劉鏡門學博

承手書知孔廟已畢工甚慰惟兩廡以費缺暫止  
此時秋稼登場可飭紳首催收了此一事幸毋延  
也委員坐縣寫捐所欲甚奢尊意竊以爲非是所  
見與僕合軍興數載庫款難支不得已而計出於  
勸捐至再至三民力盡矣然歛財召怨伏禍未發  
當事者茫未之知而希榮嗜利之徒以此翹然自

卷七

六

得奈何奈何海門學使久不得其書問揭榜後先  
按臨上五府州不知果否郡中舉行科試當在十  
月初各屬於九月當一律辦理相見不遠又可談  
聚興安克復昨已入奏尙擬移師進勦平樂此股  
如能翦除邊近可無賊踪但粵西盜多如毛刻思  
犯楚者不勝俚指臥鼓息警未卜在何時耳僕日  
益衰病意緒不佳較初至郡日精力大減仍擬上  
書乞去乘此閒暇或可蒙台司許諾也惠家蔬五  
事拜領且謝高情稠疊深抱不安

鎔兒

已由行營

回署稍休息仍往襄辦知注並聞商廳屈節喧氣

初收順時珍衛不復一一

與陳少卿大令弟

昨登舟送我情話依依不欲捨去桃花潭水不及  
汪倫乃知古人散氣類重離別形諸詩章良有以  
也此者體候勝常爲慰李營事有成否如無成卽  
不必強萬事有數有時只宜靜以俟之至居官治  
民其利害成敗尤爲國脈民命所關世運所係非  
一身一家之所可同也兄抵永寓瞬已一月自揣  
年力恐日以衰邁決欲伏處膏精固神屏絕人事  
惟文字結習粹難刪除耳諄致厚齋可索書觀之  
當備悉近狀

又

卷七

七

昨晚得赴始聞足下遭胡恭人之變才三十歲人  
何遽至此得勿爲醫藥所誤耶並聞厝南關外湘  
中時有兵警自以及早歸葬爲好文郎已來長沙  
可扶送也慈親康健已是高年千萬抑情勿過傷  
感以承歡笑至囑返舊治非所願換縣有消息否  
念念道遠祖櫬復過期未便違禮致賻歉悚歉悚  
手唁希亮察不傷

與麻竹師大令

過縣辱枉顧辰貪睡未起致失迎迓悚歎無似復  
惠珍饌未敢拜領

銘兒

來舟中極道殷殷之意尤

愧尤愧比維侍奉百福體力綏佳爲慰湘潭舊爲  
繁富之區而今昔迥殊苦樂頓易運會使之然邪  
其最可慮者民氣不和措施不能自如不和乃湘  
中州邑同病是所望於良有司調其氣馴其心庶  
幾改觀耳擇賢使能台司極殷切大才槃槃必能  
上副恩注

某

甘心韜伏匪伊朝夕昨面辭方伯乃

堅約以四月杪必須仍赴長沙不知何所取於老  
拙也此間亦大非從前官人不能執法小民藐玩

卷七

八

悍俗益驕富川攻城餘匪已竅永江劫掠頻聞頃  
又潛伏甯遠巖洞間素多不軌正恐一呼而起爬  
沙手腳芒芒罔措耳知愛故略言及此勿令外人  
知又將以好管閑事誚責我也把晤尙未有期手  
謝稽遲希鑒之

與李介堂大令

前以

銘兒

奉奏委赴湘衡辦理團防清查此件必

妥實周慎方能有效大非易易老懷極爲軫結因  
念足下久於吏事忝有同官之誼當指示機要幸

或無過十月杪

某

經貴治時值珂駕親詣三門一

帶不獲拜昭嗣亦不及作書問邇大段了當否方伯允鎔兒回長沙度歲不審何日方買舟也適王初老過我爲言曹識山在足下幕中識山乃湘中名宿所學甚深與某交二十年其人最伉爽生長於斯一是與之商權當無差誤不知明年渠願畱否并希見示

### 復玉兩峯大令

力至辱書始知老嫂於八月去世中壽失此賢耦自必感慟逾恒然一縣之事待治於一身百責所叢至纖至微皆當盡此心力務抑情處變勿過悲

### 卷七

### 九

哀是所切囑道遠未蒙計告頃又過時不獲弔奠悚歎悚歎前聞新修縣志體例精審刊成惠我爲望序言極好畱備誦覽文琛日漸衰頹切欲休退秋初台司以總纂省志相屬郭中丞崑函來商已縷縷辭復而此議今尙喧傳浮名鮮實維繫徒勞决當以病乞去十月望後尙擬赴長沙婉陳情狀耳後永州集八卷已啟得埭呈希教誨深秋仍暄熱動定珍衛

### 復蕭樹滋太學

昨得書甚慰兩年不相見僕益衰憊矣故鄉無可

棲託黎都督割宅居我并爲我籌穀石以資饋粥  
豐爾漂寓究非長策也愚溪上閑地三十丈乃咸  
豐末年趙暘谷爲我購得謝郡後擬結茅十數間  
環以竹樹壑蔬圃一二畦大好溪山卽休老於其  
間以樂餘齡迄以空囊尙未能料理或銘見補官  
日爲我營度耳武漢頻年大水流亡無數形狀極  
艱苦冬杪回里省視極是西陵尙無災知必安善  
文琳之件厚顏乞人兩峯諒之不縷縷把晤未有  
期臨紙悵然

覆蔣晉階大令

卷七

十

邵州修志之役以王潤生曾星槎兩弟意特殷諳  
台司亦復憇惠不得已始有此諾暮年心力實不  
堪此勞費也詎四月望抵長沙適有糾眾阻禁縱  
火焚船之案傳聞涵涵方伯專札查辦迫促行程  
冒雨踏泥於朔日抵郡始悉此件已含糊了却恰  
似近來應試人文字看似真切卻無一語到題生  
平不敢隨聲踵誤貽患地方十數日來且喜米穀  
流通無滯城鄉安謐如常應緝拿正犯已獲渠魁  
擬少緩料理畢卽請銷差永州尙有飭查者月杪  
仍折回耳志局甫經採訪尙無藁本且俟之足下

久處瘠區尙復勤勤爲我籌旅賞感切何可言喻  
虎膠拜領惟遷喬綏吉爲祝朱序珍調不復一一  
與於桐軒大令

屢辱惠存無修啓者僕又以疎嬾不親筆楮未裁

覆也比天氣已涼動定多綏爲頌黔東軍務淹久

席帥病體如何右銘去一月矣尙未返省門極爲

馳念聞州中方錄送文武童知必紛忙以大才了

之當恢恢有餘耳僕老甘休退茲猥承主舟之役

實非所願而日來頻奉札催故增廠鳩工以冀速

成公牘尙懇借才異地卽日料檢禱切禱切此次

卷七

十一

奏定新章局中執功者皆刻名船脣此監工考誠  
之義花名清冊斷不可少縷瀆統希鑒原

覆駱階平叅戎

昨覆少卿書縷縷說道州事想已過眼也此數日

間州報四尸橋匪徒焚掠調兵往勦獲勝擐旗賊

已竄散蕩搖幻象此只可作海市蜃樓觀耳如但

迴映前文就此了結冀免台司詰責其用心亦自

可憫可笑倘更藉端搜治復仇修怨放手殺人大

恐弄假成真禍變便不可測諸公衮衮誠無知兵

者然從紙片上推索揣勢料情豈必心目皆盲邪

可商告少卿萬勿張皇依人學語遭人笑唾至囑  
至囑郡城寥然無事兀自芒芒籌防卻又不先下  
手練團鄙人殊不解耳十年前隻手危置是何等  
形狀足下皆與我共之較今日何如

復胡少卿別駕

道州一大劫案耳事先茫不知覺及禍發乃倉皇  
逃避捏飾情詞冀揜譽尤比復捕風係影力欲窮  
治放手恣殺正恐激成大變也此間驟聞兵報卽  
封閉七城街市爲之驚駭應試諸童哭竄紛紛強  
半絕堞而出當告芳字兄當以鎮靜爲主派探確

卷七

十二

查隨宜布置安定人心切勿馳稟而是夜文武已  
同詞挿羽遞發矣深夜闌入焚署劫獄其來無端  
其去無迹而謂能免憲詰邪昨又招勇二百點兵  
一百以赴州搜捕爲名鄙意以爲大可不必其委  
涂吳兩少尉往察則不可緩耳甯遠俗習誠如來  
書所云已受篆卽不能畏縮以圖便安膽大心小  
天下固無不可了之事也素相知好故敢妄噴縣  
試俟府札極是階平不另緘旭初未便致書千萬  
爲我慰問

辱書已謝事回郡局甚慰甯遠最難治此兩月中  
安輯無患且不至虧累尤可喜也鄧大令頃請兵  
辦防據稱接仗斃賊一人來固無端其紛紛散去  
乃不復偵探確實邪昨與方伯縱言及此總由道  
州所用非人虐民以逞遂生出無數枝節茫茫誰  
其知兵畏懦張皇大恐弄假成真爲邊圉患階平  
夙明愼此番會銜未免俯仰隨人亦可詫也某以  
私事尙未了當大約五月初必可買舟泝永見釗  
兒乞告之獻歲大吉并頌

又

卷七

十三

別兩月體候何似有生子佳兆否甚翹望湘中局  
勢困敝極矣中丞以龍益失守奏報遲延屢降嚴  
旨但望伏莽盡消毋再滋擾庶上慰宵旰憂切耳  
然未可必也此間昨月廿七八日章字三營散勇  
爭執扣餉索增墮鬧縛其營哨長追殺統領其時  
德山游勇甚多將伺隙來城焚搶文武頗恇怯無  
策居人大恐幸熊大令明能有擔當加價解散而  
省門忽有散四畱一之札令王綬卿點親兵五百  
前來復致聞風肇釁頃竭力搜借又擬先期撤遣  
或不致藉口生事矣益匪潛遁浮邱山未曾擒剿

昨竄近喬江百餘人各執短刀挨戶擄捉聲言復仇矣遇我兵勇倏四逃無跡从灰將有復燃之勢如何如何愚以爲不急急擇吏以安民但誇武事禍終未已也軍興以來無業游民應募充勇妄殺平人僥功濫賞慣習欺冒毒孽今倍於前管帶將弁貪者但謀慾壑之盈能者已成强弩之末大帥循聲據迹茫不識機宜亂絲夢夢何由收効况多端塗飾予之柄而張其燄乎僕嘗稟陳招勇事宜有云在今日以爲可恃之長城在將來必成難收之禍水駱宮保痛斥之迂拙無知乃不幸多言而

卷七

十四

中撫今追往嗟嘆徒深承詢一切僕猥承此役繁瑣不可言料理月餘略有端緒決欲辦竣力乞北歸耳瀕行情文稠疊感荷之至布謝稽滯并希鑒原

與朱星槎參軍

承惠書聞已履新受事驥足暫羈牛刀小試爲之馳慰眷口計已偕來尙須僦屋而居僕六年前嘗

一過此湖山如舊城郭依然竊歎瘡痍未復耳昨

銘兒

家書來知伯常有去縣消息不審當在何時

賴太守已去長沙否芳字兄卽日須開棚試見時

均希爲我道意僕來此忽忽四十日矣謹奉中丞  
札飭示令私墾業戶自呈畝冊候勘項已繳齊因  
積水不及往丈此數日稍稍縮落然淤泥尚深三  
四尺仍須一二旬方可親詣督辦此後核租造冊  
酌留水道一是早有成竹竣事似當在秋分前後  
矣此行初頗料其難不意向無阻滯且甚感悅從  
知天下事只在準情酌理如強其所大不願而欲  
爲吾之所爲毋怪其牴牾也巴巡檢昨自黃家疔  
來縣有擬請迴避原籍五百里之舉足下較伊更  
近愚意似可不必但不省記吏部例非印官須迴  
避與否埒聞查悉告之同鄉交好萬不可循官場  
習氣尊版奉繳並頌任喜

與周鐵園

前奉辰陽舟次書無由裁覆嗣聞十一月朔尚在  
朗州水涸須穿重湖而去屢與廖協戎言未嘗不  
歎行路之難也比復荷惠函安抵潭州修謁台司  
均極優待欣慰無似伏惟侍祺千萬體候增吉爲  
頌僕移署後檢料塵牘往往至夜深不得臥而北  
溪口忽有匪徒糾劫之事懸賞購線函紙頻催幸  
賊並獲月尾定讞梟者三斬者三杖斃者一昨

已據實縷稟各憲矣暮年心力不堪薑藁惟地面  
亟須整理不敢斲法亦正不敢邀功足下知我當  
鑒及耳草草報聞卽賀獻歲吉祥不宣

與瑞熙儒太守

老衰乞退將卜築於愚溪西山之間以嬉餘齡舊  
好至交久不奉書知不我訝也足下近狀何似聞  
常郡今夏又患水秋收能有幾分惠政所濟當不  
至災苦武陵令熊峙衡甚廉能定可相助爲理卽  
日聞令嗣君須擇師適余我如明經由永返棹過  
我長沙寓廬我如清才偉抱實一時之雋傑恰在  
閑居又以母老不欲遠離鄉井延之督課必有時  
雨之妙手書以告非泛泛推薦也書江先生不別  
紙並希道意

覆朱明廷遊擊

送別忽已匝月聞所事猝不能清了已如囑函致  
東墅代促之矣大抵人當抑鬱不如意時最宜放  
開懷抱不自纏擾我自得其爲我天下有何不了  
之事有何不可恕之人隨宜處置嘗使此中空洞  
無些子塵溷正自受用無窮鴈峯寺新修指月寮  
頗疏潔石鼓書院極高爽暇日登覽將此番證逮

作遊衡州看切勿愁損迂語幸採納之此間得雨  
已足僕閉門如前值天氣晴和便過黃葉渡看桃  
李花徧訪西巖新巖芝山諸勝消日遣興他無一  
事也率復

與王小初太守

年來伏影永州甘息衰老不事筆研姻友多不通  
音問足下當亮我也初夏忽奉飛檄調辦直隸糧  
船本欲赴省門辭謝及謁台司乃知已經詳奏無  
已遂有朗州之行屢候尊甫丈人起居精力康健  
甚爲欣慰前荷手函將鳩貲入都遵例引對姓名

卷七

十七

簡在定蒙恩擢竹報知必詳及比有人自豫章來  
具述足下賢勞因饒州械鬥案迨徃察究樂平梅  
令乃吾故人蕝浦學博之冢嗣也夙著政聲不知  
此件有無絀礙俗悍民頑官長誠不得辭其責然  
公罪或可從寬幸一是推愛而煦拂之感荷靡盡  
率瀆希鑒

又

抵湓城晤陳南村大令聞足下權首都事新猷覃  
敷爲之歡喜無量嗣見許關使知賤子姓名早達  
清聽由足下獎飾而然僕學質行能無足采錄乃

殷殷說項此大君子推賢擢能不遺纖細之風規  
袞袞台省濫引私昵誰其似此古語云好善優於  
天下足下他日建立安可測其所至乎比得湘中  
家報未尊甫廉訪公計已引對出都矣僕謬奉此  
役辭不獲允造難運尤不易此中困頓艱窘情形  
非數干言不能罄頃因權稅稽留而部催接運新  
漕急切不能自主每念峴庄中丞卓識定力奏歸  
北直排造非徒公家事可期核實更埽卻外間無  
限支蔓眞足令人敬佩也

復王敬一同年

卷七

十八

月之上澣奉手教又刻詩一紙陽報不差仁者有  
後爲之歡忭無似卽欲裁賀而右臂爲風所襲久  
不瘥捉筆作字痠痛不可耐故遲遲至今大作屬  
和入春以來痰痲雖少瘡口中仍不時作鹹味夜  
卧醒苦舌乾此間無明醫又無成方可檢老態日  
增清興日減三闋月寂無一字幸鑒之昨忽奉督  
催邵志之札擬卽日赴長沙舟經衡州登堂乞診  
視并試啼聲摩抄老眼看英物也

與馬晴巖太守

詩二十四卷後永州集八卷曾許回永寓封寄之

便故遲滯非敢忘之也無端調委催促頻仍觸暑  
重來殊可一笑昨貪涼過訪足下晨睡未起不獲  
晤談甚悵茲送上新舊刻共九冊察入并希指示  
瑕疵爲荷柳文惠全集亦已版得箱篋尚在舟中  
俟檢出奉致耳

與羅書江

大雨八日秋漲已丈餘隄障可慮晚禾尙有未穫  
者已穫亦須風曬登倉棉花濕損收成必薄似宜  
告知熙儒太守設壇祈晴以重民事局外聞身不  
應干預以湘中丞望有年度或安輯無擾設遇水

卷七

十九

溢殊難措手耳

又

保固結六紙乞察入加結則查驗無異理合加結  
云云此舊式所謂依樣胡盧無新巧也日內卽申  
道不過多寫預印字已耳熙儒太守不另并問新  
歲多祉

復李璞階軍門

藻卿回永荷手書敬悉近况佳善甚慰前年太夫  
人之變未蒙計聞不獲函唁尤悚尤悚秋試竣計  
已返旆有捷音幸示我也承問江華鑛件鄙意以

取砂試煉直辦始行稟請一切待用款目皆由鉛  
價支銷鎔獲之銀儘數解庫以協軍餉卽先事亦  
不請領毫釐而昨月王朗卿方伯走人前往挖砂  
至今未能運試此中別有委折國運中興地不愛  
寶此事或當辦就耳某精力日以衰屢早求休退  
尙未邀台司允准漂寓山城偷閑養拙無可布告  
草草奉復珍攝爲望

復李星源大令

專足至承書並抄寄台司批示及另批一件均收  
入此事只合如此了結昨得鶴田太守函已具悉

卷七

二十

矣比伏熱體候勝常爲慰

某

回永後不會一出門

並不曾一把筆作字固畏暑亦老嬾然耳方伯促  
我回省銷差仍是不允休退世事艱窘日甚一日  
自問無轉旋才力投閑韜拙作一自了漢非敢忘  
世亦不敢自詡高尚也居邵州一月深荷周旋猥  
辱厚貺久未裁謝甚悚並縷縷足匆匆回縣菊潭  
太守楊煥如弟不遑別紙希爲我道意

與曹星巖大令

春間聞夫人偶爾違和書速鵠臣來縣診視繼知  
爲藥餌所誤旋已如常甚慰時文琛將赴長沙故

不及手函奉問也此行本擬以迴避爲言上書乞  
退而方伯堅不之許適邵陽有阻米焚船之件專  
檄促行無已於五月朔抵邵遂密擒其首惡斬梟  
之復酌定城中所存米穀之數以其半遵憲示流  
通又訊結湘鄉人所指控者分別懲辦凡二十餘  
日事竣於今月三日觸熱回永矣世局艱難老憊  
無用忍而忘世中實憊然足下治行上臺皆深知  
之計移調或當不遠也長隨曾福願來効犬馬希  
畱用歲收何似不缺雨否尤念尤念侍奉多綏盛  
暑順時珍攝

卷七

二十一

與勞湘舫

昨拜書匆遽未能裁答甚歉甚歉茲又以賤辰辱  
賀並錫多珍尤增慚悚遠來不敢概卻謹登一二  
感荷良深入秋仍暄熱惟體候安適爲慰此間龍  
陽一闕後迄未安戩月杪章營撤勇索增欠餉勃  
然滋鬧計已聞知王綬卿張方臣先後來當可肅  
然無事矣花源咫尺桑麻鷄犬萬戶嬉春信神仙  
窟也僕以衰憊乞退人謬肩此役先經入奏故不  
獲辭刻日興工煩疲無狀草草手謝不盡所懷

又

別數年此相距才數十里復不獲談晤殊用悵然  
秋氣初涼起居何似桃源爲仙鄉福地澹無一塵  
定多佳趣也某猥承此役勞疲無狀卽日奉合肥  
督部札函益增煩切相地添廠以期迅速藉酬知  
我夙仰足下廉幹精能到手卽了公牘尚懇必能  
相助爲理耳此次修造官員及工匠姓名奏明刊  
之船屠花名冊斷不可少如貴屬能於六十人外  
手伎精敏者多有增加尤荷尤荷

與曹識山明經

搜行篋尙有刊版拙集茲送覽暇日幸挾摘差失

卷七

二十三

爲荷多年契密義重切憇勿但循聲不責實也明  
日過我把杯快談劉后老亦舊相識神明未衰飲  
興猶豪已走价邀之

與童樸安

回縣三日遲遲吾行徒以羅烏網魚計與消災解  
禍耳而畏避不來寂無消息似此事終有大掀騰  
抑由數定非力之所能爲也西域賈胡淹留可笑  
決意去澧州矣希午後偕菱塘過我商定章程稟  
稿並攜還此望無似

與舒又濂大令

後永州集匆匆得向有八九訛字不足觀覽也  
且多率筆直書不無開罪同官之處屢辱見索謾  
付去勿示他人畏人避謗老衰彌甚幸鑒及

與楊伯川

令弟過我不獲相見甚歎昨以此卷見示尊甫嘗  
與我言之我不可無詩而日來心緒煩劣不事紙  
筆今辰起率成五十八字了責試畢携返山居不  
足資老人一噓也莫子偲所著唐殘本說文木部  
箋異極簡核近世究心小學者無此功力茲並奉  
繳

卷七

二十三

與趙暘谷司馬

得愚溪上地便欲徧栽竹樹中起茅堂十數間隨  
勢高下間以亭榭春秋佳日命儔歡侶相與吟賞  
藉娛頽齡命之曰寄食山庄嘗與我老友商度之  
昨年囊錢已罄未及鳩工今忽捨之而去絕好溪  
山實所癖愛夙緣未了或當再來也居廬密邇幸  
不時往過毋令廢爲瓦礫蓬蒿之場能補種桐柳  
松桂使四周成陰尤荷蜀中澆花黃州雪堂前賢  
勝迹流傳文藻我何敢妄希追配欲爲永州增一  
游觀地已耳頃海琴將卸五簞未必再赴神京息

柯別墅聊可棲託而我營畫有年竟無一椽一瓦  
愧良多矣

卷七

二十四

與吳覲臣太守

新關事大可一笑此老爲家丁所簸弄路人皆知之標皮尾梢後數日到埠科稅銀才八兩私索三兩方得放行如若不信有詩爲證茲非其證歟然文琛決不以此瞋惱轉以因此識足下爲慶幸也足下明白事理又極平正雖親近不數而大致已得之昨合肥公談次殷殷以人物寥落爲憂而於足下似有深意伏望勉之文琛已抵湓浦舵水買有皮槁津貼關使量尺論價尙須三數日方能了

訖近年官人假公牟私誰實真心爲國僕老矣切祝賢才輩出在位在職整俗移風扶危振敝八方康平時和歲稔俾白頭人優游歌詠暢嬉頽齡此外無癡望也雨篷岑寂短柬敘情并謝不一

與傅受之明府

昨以糧艘私賣頂充事瑣費清神并辱騶從屢詣江壖殊抱不安語次見足下於執法之中藹然寓恤民之意極爲欽佩嗣奉札不敢久延卽挂帆東下不及走別尤爲歉悚某月望已抵湓浦各船於十九日始全數齊集舵工水手各有皮槁護水歷

來如此而關使須量尺論稅此輩但知有利不知  
有法然窮困謀生其情事正自可憫一半日當可  
了當督催前進矣手謝不莊知注埭聞朱夏體候  
綏吉爲頌

與萬少昫大令

昨幸獲接晤甚善塗謨巷誦官長廉明老叅譜未  
尤爲欣忭淮關論稅致騶從僕僕炎毒風日中始  
得了卻感切感切高齋小集許治蔬佐譚實所深  
願祇以糧艘過牖人雜事靡不得不躬親鎮壓去  
治已遠時又小抱暑恙遂至爽約并不及踵別歎

卷八

二

抱至今承遣价惠我多珍拜領一二淮水湯湯深  
情殆過之矣秋晴風多無雨體候清安甚念

文琛

於月之五日抵濟州矣船隻落後者尙一百有餘  
大河改道後形勢迴殊尙記二十年前督運例木  
自宿遷至臨清斗門凡五十有九而臺莊至韓莊  
八牖三灣尤險急今不歸水無司啟閉者強半廢  
壞邳滕魚臺間湖水相連瀾漫可百餘里往往守  
風不能計程負索無路漕轉經過似未穩便不獨  
安山一帶有阻滯也山左今年水大似聞張秋已  
築壩節近霜降舵水又復遷延屢奉李爵帥函催

恐津門交船冬初尙未可期必且俟設法抵壩後  
再作區處文漕帥匆匆一面辱荷優禮未能謁辭  
悚仄之至荷參時乞爲我具達受亭觀察禮門太  
守漢閣世兄均未作函希叱名致意手奏並謝惟  
美除超遷集祥納祐爲祝

與李湘浦大令

昨事咄咄僅小口角並未互毆粧傷圖賴意將云  
何增設炮船水勇所以防患似此信平人爲其所  
苦者不知凡幾矣自江入淮含冤赴愬乞官受理  
州縣棘手良多大帥非不聞之懾不官聲亦不嚴

卷八

三

加察詰日月侵尋支蔓蟠固伏禍突發正恐猝難  
收拾耳足下處此計亦甚碍難諭兩造赴署質驗  
以爲當了卻矣而又生波折龔軍門來先已洞悉  
其悍僞情狀或痛懲之以肅兵律道遠夜深有勞  
騶從手謝涼秋氣候不時伏惟珍攝

與王幼石刺史

四十年前同鄉舊識忽於天涯握晤歡慰方深乃  
足下以公件他出僕亦匆匆督役遄征不獲暢聚  
轉增悵惘金鄉會案聞諸道路官人大是孟浪辦  
事人難得曉事人尤難得浩浩人海坐此彫敝如

何如何計大才治此勢絲決無難耳僕已次張秋  
昨泊荆門闢矣江北回空船先事築壩九所不愁  
無水但未敢開掘暢然北去頃擬稟李爵帥丁宮  
保候批遵行大約年內當可抵天津也外公牘希  
察及二犯卽點交去人領回爲荷初冬驟寒起居  
珍重

又

到州便欲偕往州學讀范式鄭固諸碑會各以事  
去須臾沙散不克一暢古懷解纜時殊用悵然昨  
承寄墨場數種極爲珍荷雨城新得石又家藏所

卷八

四

未有也青嶽相國衛聖道甚力學統一書開示後  
學精心剖判深切著明功惠不小此刷本極完好  
不知板尙存否經義齋集尙非其全者縣中當別  
有刻本也李夫人墓誌古文義法不敢妄議其論  
叔嫂爲服本之前賢推闡古禮詞意俱圓到食品  
二種客中所無鄉味尤佳道遠情長臨風拜領木  
瓜無以報且感且悚比已嚴序體候何如馳念馳  
念傳聞河漕二帥駐節州中有踏勘修浚之舉已  
定議否淮不刷黃汶不入運河決多年全局遽難  
復舊此番督押經過局外體察似此時須最先下

手者張秋較安山爲急也如再因循南日以高壩  
土填積河過沙畱非獨南漕阻滯大恐東昌將有  
水禍矣衰謬喋喋老兄作閑話看可耳某抵津已  
半月餘官剝多守凍靜海天津屬地至遠者不過  
百餘里連日打冰風緊天寒乍開仍合計齊集在  
明春矣裁謝遲遲希鑒並縷

與丁午橋大令

五十年老姻串徒以塵海奔馳不曾拜識光儀昨  
勞勞督役經過棠治雨中蒙遣問於數十里外始  
悉大府甄能換縣莅此忭慰靡似登堂肅謁温文

卷八

五

酌實儒吏風裁令人穆然意遠欽仰良深旣辱騶  
從惠臨河千復餉食品多珍長者之賜不敢堅辭  
極感且悚

文琛

於月之十二日先次津門官剝到

者無幾餘皆爲凍所阻尙在靜海屬地相距可百  
餘里日來頗暄煖幸乍開凝沍或可齊集否則驗  
收當在獻歲發春後矣晷短途長初亦不欲犯寒  
遽返湘中行固所願畱亦不惡也頃已敝屋朝陽  
觀甕爾棲息仍促舵水打冰前進不審能移釐否  
瀛眷計已安抵官所甚念久不得

鎔兒

家報

嗣東

嗣東

亦無書來豈洪喬浮沈邪手奏鳴謝埒及近

狀不莊快雪時晴尊候多佳

與傅子含大令

昨在州築壩開壩極荷注拂風日沙塵僕僕往返  
不厭勞苦感何可言近年官人於分內事尙漠然  
不肖實用其心力如足下以國事爲己事懃懃懇  
懇委曲周至將來假手斧柯其治績決非眼中人  
所可比也尤深敬佩僕於前月之十二日已抵津  
門糧艘遲鈍雇役稽延竟爲冰所阻多在譚官屯  
獨流楊柳青一帶弔泊相距百餘里諭令打冰僅  
有來者出口時艫舳以急流衝撞間致傷損已飭

卷八

六

涂從九察明修理尙屬無多俟了當再謁觀察公  
具陳一切能推情驗收俾舵水早散去甚善否則  
春風消凍後再作歸計耳手謝並拊鄙狀寒辰慟  
慟起居珍攝

與龔幹卿刺史

昨過棠區距城遠不及拜晤甚歉涂少尉來具知  
瑣事極勞清神並悉才具能敏尤深佩仰居官三  
字箴清爲持身行政之本必勤乃可以救時濟物  
堆案一無積壓則心神清豁日力悠裕非徒在我  
從容而外間益惠良不少也嚴玉田一犯造言惑

眾假公牟私致各船遲延十日之久漕運要需屢  
奉李爵帥函催今年不能過張秋而北貽誤匪輕  
乞看管擬稟候批辦爾時再備公牘奉達也手謝  
卽問體候綏吉

### 復宋東軒大令

卽日李凌卿明府來寓展讀手函知大嫂已安抵  
定州官廨欣慰無似僕出臨清口時督促先行旋  
接恩孫報悉大嫂由德州舍舟而陸差勇僅護送  
一程卽回水次極爲懇切同行旣伺應疏簡中途  
又不獲料理周妥深抱不安幸黍葭葦不我誚讓

### 卷八

七

也承清釐訟件上游特加委任足徵幹局優能移  
植豐壤拭目以俟僕來津門已二十餘日官撥多  
爲冰所阻近可三十里遠亦不過百里未能齊集  
觀察未奉委驗計點收當在春初有無挑斥難以  
臆度惟工料堅實所堪共見耳年至體孱思退已  
久事畢回湘乞休今茲台司其我許矣尊甫赴山  
右已辦嚴否月卿侍行否東孫幸列美科齒及慚  
甚匆匆呵凍手復歲暮風雪體候佳善

### 與涂鵠臣少尉

僕舟行凡七日遂抵長沙次日見方伯又次日見

中丞語次均及調足下赴船局差遣隨同造運決  
可得力台司極欣然明日卽奉札本擬專足迅送  
因念足下江華必有耽延回郡當在望後是以稍  
遲遲耳札到務刻期俶裝來一叩各憲便往常德  
勿延劍兒資性愚拙聯檣同行一是希調護維持  
之何黎二君處琳弟有書詳致不縷縷檢料清悉  
手迹携交我爲荷此差已專案詳奏上游殊爲慎  
重惟僕以衰疲收拙之人過蒙獎拂良深慚悚然  
碌碌者因人成事正復私自慰幸也伯潤幹臣少  
卿不及作函爲我道意

卷八

八

又

夜雨達旦篷背亂滴聲聲皆入愁耳遂至失眠起  
問舟人知河水已漲尺許牖門涵涌當倍之不審  
尾十五船能牽挽否泥濘中恐不能用力也復我  
甚盼切

又

鍾德喜來面問一切稍慰老懷所需鐵釘顏料如  
數仍着德喜同周得意送來譚官屯船隻務一律  
修飾完好切勿大意僕生平於公家事絕不敢絲  
毫苟簡五年相處足下所知茲更絮絮馬廐風夜

擁裘噤坐待旦致感寒瘕今尙未痊可然一半日間擬往見丁觀察具陳所事或驗收或報守凍當函告之

### 諭谿兒

三閱月所見所聞大謬不然泄泄沓沓無禁無令小民藐法玩官劫奪公行近縣然行臺省亦間有之遠州郡縣不暇過問蓋貧困至今日極矣饑寒死盜賊亦死等死故甯死盜賊耳而新歲以來春鐙酣醺酒膳珍旨魚龍曼衍午夜轟雜粧點昇平景象嘻嘻安處苟有心人未有不聞樂拊心臨觴

### 卷八

### 九

太息者魯人獵較牽老夫偶卽事微諷之了無補救樂禍忘憂憂必及之我決計行矣昨設詞陳情方伯前初十日衙參卽以達之中丞望日前後挂帆沂湘汝尙在縣城計可見面竹師極道汝好以此等纖屑繁重之事處乖戾分裂之區終難妥善聞譽言而懼汝其慎之

### 又

衡嶽有天生朮土人掘賣索價亦不高較平江所產形質稍大亦有小者以米泔浸透竹刀剖之極香潤有硃砂點於潛朮不可得矣近日賣藥者以

此爲上品壬戌年冬周稚威曾惠我兩觔許除溼  
健脾服之頗有效昨寓長沙見蔭雲兄每飯後輒  
以二三片與檳榔同嚼蔭老知醫與之談甚有理  
汝可遣人購之備家人不時之需也

又

江華羅姓以賄得縣試第一府錄送亦列前名三  
月初學使按臨牌示初十日祁江合場江華文童  
合詞稟乞與祁分號學使斥之十二日考東道甯  
三屬點名畢學使以羅姓試卷徧示九學教官及  
諸廩保閱者莫不匿笑其時某太守獨拱立不知

卷八

十

喃喃作何語是日以泄泄施施眊眊分試三州縣  
未始非誚讓也晚挑覆羅姓無名太守竟疊次稟  
見爲之祈請學使不許十四日試零新永又以王  
顧左右求之歟善爲說辭命題其鄙夷不屑固已  
徵色發聲矣而太守於十五日再四跪求煩聒不  
休人定後始懸牌補撥羅姓入府學一城皆沸士  
論譁然國家掄才之典屬吏貨賂爲市明知故縱  
不爲參揭迨使者秉公擯棄乃敢徇苟蠅營挾其  
所私置紀綱法度於不顧此其人卑陋庸劣不足  
深論所可惜者學使瞻徇不決有初無終爲人所

賣耳大凡一事之來看得明白係乎識能辦與否  
係乎力前事固盡人皆知其不可亦易於處置者  
若艱鉅猝乘可否未定疑信相參全賴一心兩眼  
審擇剖判畢竟有一箇是處先儒謂義字如利刀  
一般知之明必須處之當既已內斷無差矣便斬  
釘截鐵一往直前不爲利害所動不爲毀譽所淆  
方不至得罪於天古來多少人物壞了品望誤了  
宗社只是這轉念一差耳衰世末流能自立者少  
要之官可不做人不可不做汝其謹識之

諭釗兒鈞兒

卷八

七

途中風緊天寒黎明而起曛黑而休僅能行七八  
十里甚疲困也廿七日抵長沙次日謁合肥督部  
眷念故人肫切異常坐談良久仍囑以爲日頗寬  
不必汲汲開船撫部詳問職務擬年內入告而運  
費未領碍難報解請咨且俟初八十三兩堂期能  
發給否大約堯孫成婚後便當回常耳納吉納徵  
以次事宜汝哥哥布置周妥可不煩我心我病咳  
已少減精神尙好傳語家中人毋遠念也

駢體坵

賀張中丞署兩湖督部

昨奉鈞批以某肅陳縣中所辦各事宜附呈管見  
仰蒙褒勉感悚交縈值瓜代之及期切葵傾其靡  
已比者恭膺帝簡權制全湖逃聽臨風欣舞無似  
敬維某官公忠體國笏承家綏百種之哀牢主  
知特達峙千尋之衡嶽公望益高乃因蛾寇玩兵  
遂爾龍驤移節晉公收蔡市肆不驚廉叔入州謳  
歌來暮滔滔江漢措巨手以奠洪流正正旌旗飛  
先聲以摧餘孽大功者定重巽以申茂賞從天騰  
歡匝地某一官在遠兩載防秋足繭山城心旌鄉  
國雖仍依夫福曜實私戀夫慈雲知非常人必澄

卷八

三

清乎四海爲天下頌用綿邈乎一心

賀李中丞署兩湖督部到任

竊卑府

一無智識猥荷恩慈力勉效夫涓埃感獨

深於吹拂茲者薰弦應律蕩節遄程不勝臥轅攀  
餞之私徒有負弩前驅之願心如風燾目極霓旌  
依戀難名怔營靡似敬維某官勤熙庶績宏總上  
流令問光名騰四海英清之望文經武緯受兩宮  
特達之知方當蛾寇披猖鵬旗圍落綏綏攸賴踐  
鎮尤榮邁曩績於江淮倚皋爲固儷殊勳於魯范  
惟泌居多祥光開翼軫之纏立消妖彗德頌徧荆

湖之路永戴甘棠天爲唐室生西平人指韓公爲  
北斗瞬膺懋賞慰切懽悰卑府點黻蠻貊懸旌故  
里巢將燕代壁尙蝸黏大槩油囊悵摳謁未知何  
日晴川芳草喜奉揚共此仁風

賀譚署督部到任

竊卑府猥隸鈞衡翹依山斗軟紅萍汎闕親近於  
慈顏積素葵傾增勞勩於孺慕傳郵較遠賀廈稍  
稽實切悚惶倍深瞻仰敬維某官公忠體國才略  
冠時威懾四溟垂新息壺頭之績惠覃三輔繫征  
南峴首之思茲者蕩節遡臨芝綸寵拜臺省袞袞

卷八

十三

非公望其誰歸江漢滔滔奠狂瀾於旣倒栽湖湘  
十九州之棠蔭盪淮汝數千里之莽氛迅奏膚功  
私殷頂祝卑府以部民而爲屬吏當晚歲而攝邊  
州五色雲開望望絆鴻泥之跡尺波春漲迢迢賸  
鳧藻之心謹浣露以敷陳竊承風而抃慶恭呈履  
歷祇叩崇釐

賀劉撫部到任

竊卑府前此泉陵供職欣逢珂旆按臨再獲親承  
每叨訓示嗣以萍蓬靡定遂爾翰牘稽陳仰止雲  
天動彌年歲茲聞新除玉詔來惠南湘吉報遙傳

歡忱益摯恭惟某官配蹤元凱比譽蕭包風肅赤  
輅留良史傳馨之事星羅黃祚上仙源積慶之圖  
介節久荷夫殊知湛恩重臨於舊地薰弦入奏吉  
座允升換雙旌六纛之榮鬱爲時棟錫七澤三湘  
之福仍是甘棠伉獎績以增班竊望塵而臚抃卑  
府邊隄承攝慈範睽違未能齎印以迎有如匏繫  
用敢抽毫自致不盡葵傾恭呈履歷祇賀任禧

賀李督部新正入覲

丙秋九月辭赴溪州拜聆渠言辱承獎勵倏忽五  
載戀嫪一心幸踐鎮以重臨曾肅牋以遠徂藉伸

卷八

十四

歡躍坳達鄙私茲聞孟飢遵批展覲嘉謨入告淑  
序初更曩代當布德施惠之秋勳臣有納洪延釐  
之慶攀依獨切忭悅何勝恭惟某官闔暢羣雍化  
勇四始謳誦徧荆衡之宇景祥占翼軫之躔澤永  
棠甘陋陶士行之種樹名垂山重笑杜元凱之沈  
碑崔駰同森膺門最峻南條以江漢爲大非鉅才  
莫奠洪流西乎爲社稷而生在今日誰如公望伯  
歌季舞右粥左餐養潔蘭笙人羨白魚饌好律調  
葭籥書憑丹鳳啣來恩露九霄福星一路龍光疊

沛燕賀良殷

文琛

萍漂無根匏繫不食疲鴛自甘

伏櫪遇主猶嘶閑鷗只合眠沙驚時欲逝頃奉鉛  
槩之役殊慚機綫之能不允乞閑差同奏伎老居  
人下歸畱西嶼之輝思發花前闌阻東郊之餞皇  
州春滿指柳亭梅驛以遐征袞衣公歸偕壤叟衢  
童而翹企負弩過發焚香乞畱活我實深感余不  
絕眷眷高牙大纛夙殊知迢迢芳草晴川累尋  
鄉夢身難鶴化依近水之樓臺目極鴻飛望朝天  
之旌旆聊呈椒頌莫罄葵忱虔叩崇祺伏惟慈鑒  
賀王方伯署撫部

竊文琛

叩違築範戀切葵心鴛汗坂而難前鼇冠

卷八

五

山而知重茲者芝綸特賁蕩節兼持當人和物阜  
之年正冬至陽生之會升明甄績履慶延釐卽日  
眞除下風切禱敬維某官冲含朗抱默運神規棠  
舍三年斯愛所憩洞庭九郡咸懷其仁輦芻粒以  
供軍籌金錢以拯溺裕靜境綏壘之偉略抒濟氓  
活國之良猷地望允符天顏有喜九重心簡用承  
雨露之恩五色牙旗頓煥風雲之彩早成勳器宏  
總上流增老福於慈闈荅殊知於文母從此礪煙  
寨火凜秋肅而戴生成定知嶽羽湘鱗被春溫而  
就安妥皆大抃舞豈惟鄙私文琛 謬領舟官久驕

枉渚墮顛且白巨眼能青乘張騫之槎仰瞻霄漢  
擊祖述之檝遠涉關河吉語欣聞蕪詞謹玆揄揚  
莫罄翹企良深肅請勛安伏維崇鑒

賀直隸李爵督新年

某夙蒙庥蔭未獲趨承軫高山仰止之懷馳廣漢  
泳思之慕茲已崇階咫尺復因窾木羈延仰園煦  
於青達葭帷候轉臻景祥於黃閣黍琯温回令節  
欣逢頌私靡罄恭維某官桐圭翊德槐鼎調元壽  
母無疆宜民永慶當天子膺圖闡珍之歲正大臣  
受祐集瑞之秋石匱金書濃厚晉河山之秩瑛盤

卷八

六

翠管駢蕃頌雨露之香武達文通爲大柱石填賡  
箎應皆良股肱威讐四溟澤剪三輔天開日月煥  
龍蛇旌旆之華海曙雲霞靜蛟蜃樓臺之氣烽塵  
戈馬西平爲唐室而生道德文章北宋惟充公兼  
備皇都春早勳第恩多翹企猗茵曷勝鳧藻某飛  
蓬無意朽櫟非材繫牒湘區倚岷海縣雲帆迢遞  
縮地無方冰鑑晶瑩塞川莫進幸惠風以布閭如  
甘澍之及時龍門之水三千魚仰流而尾赤麟閣  
何人第一驥驤首而毛拳積素謹輪裁紅肅玆藉

攄藿向用代椒銘虔賀新祺伏惟崇鑒

賀倉觀察新年

月前珂玉來臨不及從容侍謙匆匆拜送又未獲  
面領訓言下懷徒馳嬰慕綦切茲者律回星瑄祥  
擁蜺旌恭維某官秉河岳之精英普湖湘之慈惠  
張士孫能識大體劉懷慰久著清操勤心於竹頭  
木屑之間創法在柳課葦錢而外板輿八座於時  
賡壽母之詩瑤札十行卽日拜頒春之詔超升豸  
繡疊晉狝禍允共翹瞻豈惟私頌某省門跼影代  
局羈身壽補蹉跎散樗自笑春來天地小草先知  
素愛竊叨丹忱若結祇憑蕪東恭叩新釐

賀陶廉訪

卷八

七

久違慈範時切依馳雖蕪牘以頻申實葵忱其若  
結比聞恭膺異命陳臬湘南逾格榮遷曷勝歡忭  
敬維某官豸繡風清麟符惠洽禔躬篤祐新恩偕  
新序以俱來執憲揚仁嘉績乘嘉時而并楸屹矣  
千尋衡嶽公望益高爛然五色祥雲天書特賁知  
游尉不能曲筆墉茶必消望于公更建高門袞槐  
相襲架頌九郡香蕪萬家某遠阻山城翹瞻鈴閣  
喜升階之疊晉銘柏無文值泰祚之剛逢頌椒并

上謹薰鯉稟伏達蟻私

乞卸永州事

竊永郡地多伏莽鄰煽狂氛職猥荷恩榮謬權此

篆兩年以來烽驛馳警殆無虛月諸賴憲台指示

機先幸免疎失實無寸長堪云報稱頌者甯遠餘

匪憂經捕勦首要已獲大半地面亦漸肅清仰託

慈庥民人交慶伏念職氣性剛拙動與時違改官

來湘常被口語甚或假公構隙合力擠排卽如上

年東安准首之案不有今日幾成莫白然束髮執

版稍知理義甯可見罪於僚友不肯負咎於神明

耿耿此心天日可鑑到承任事深知非據尤愧無

卷八

六

才益惟以勤自勵鷄鳴而寢需火而興一字一畫

從不假手不敢避勞亦不避怨恪守故步以迄於

今乃自去秋九月以後舊患失血症每發必劇近

則肢瘦毛悴夜不得眠一言不覺煩聒再三十事

竟至遺忘五六衰容老態侵尋而至強自振厲大

恐弗勝况兩粵盜風日長一日卽永州官事日難

一日無財可慮無人尤大可憂此閒困頓掣搖情

形未敢一一條舉職朽材支厦片羽填波以多憂

且病之身履至重極要之地時事孔棘籌畫難周

人氣不和前功靡恃每一循省惴惴殊深惟有懇

恩委員接署俾得速回省門徐覓醫藥始衰之年  
圖報有日稍見痊可卽行當差因病得閑今日誠  
有所不忍而知難而退人臣要不敢自欺瀝誠干  
瀆伏乞垂察

再乞卸永州事

卑府

山郡承乏已逾三年戀劇偷榮效微毫露上  
春縷祈交卸仰荷批示優容曲加勉勵下懷感愧  
淚與汗并嗣南路保舉猥膺獎薦渥被鴻私聞命  
自天一階倖進在憲臺以超報勸徇功之士在卑  
府以冒榮叨逾分之施冀副憂勤臨職彌懼而粵

卷八

十九

寇旋犯零界東安警報突來幸旬月環攻深魁就  
縛防勦兼用地方暫可晏安豈不知隣氛甚惡伏  
莽未刈燎草於原風吹又生斷蛇不斃傷人必甚  
十月間曾懇飭王守郴州事竣督勇前來未及准  
行已有永江之禍此皆文琛力小任重福過災生  
於人無尤撫躬自疚伏念城寨失陷律有專條統  
轄兼轄例應議處文琛有撫俗宅生之責無綏邊  
禦侮之才未能先事周防致使吾民失所興言念  
亂徒用厚顏倘復月日之畱更益邱山之罪况一  
生經拙斂怨良多抱愚守迷終莫之省召闢取怒

理有固然而且宿患嘔血屢醫寡效鬢斑齒脫近  
更健忘千里巖疆刻不可忽而事事皆待理於衰  
病相乘之一人經畫不周疎虞立至苟或養安於  
祿位必當獲譴於明靈茲者二城收復四境已無  
賊踪痛定追維倍深惶惕計惟有叩乞詳請撤省  
聽候部議卽日委員接任倦鳥辭樹早悟色斯巨  
鼈戴山永啣思重方當朝廷多事何敢存嗜退之  
心已無家巷可歸究難昧思愆之義瀝誠干瀆千  
萬賜察

乞駱中丞批允回籍

卷八

三

前奉藩司札開樊燮控案吏部遵批嚴議奉旨黃  
文琛着降三級調用不准抵銷等因奉此

卑府以

罪貶官無心干進昨者旅見具達鄙私蒙溫詞之

慰畱憫素况之艱窘再四獎勉汗與涕俱伏念

琛夙本不文時當用武庠員忝竊邊寄久膺屬鄰

寇之猖狂復內訌之紛沓結團禁暴儲勇安營濟

以貲糧導之忠義四百餘戰危全鋒鏑之生五六

年來勉竭涓埃之效旌旗色變金鼓聲喧豈曰人

謀殆有天幸而乃終歡不解非意相干一紙飛誣

千里證逮鹿方走險原不暇於擇音梟本不仁其

何有於同類行賞據其功績造謠奚自傳聞苟其  
執憲必平亭疑有法鏡不疲於屢照權不故爲畸  
輕何待矛攻自爾的破詎知花不蠲忿蠃能射人  
抹公牘之明徵走私函以潛構會逢疏辯更觸威  
嚴柄相因而簸揚內批斥爲愆愆終朝三禡訟以  
窒而終凶載鬼一車睽以孤而无應固已倒冠莫  
整破甑弗顧此災曷必追咎何事不可相容君門  
九重誠有犬馬之戀臣年六十漸迫桑榆之景徒  
激昂以報答旣擺落於嫌疑棲遲衡門不渝此志  
維繫空谷愧匪其人誠以道之屈伸在天身之進

退有命寂守迂抱抗希前修赧脂韋莫之偕纏坎  
壘而不悔一從筮仕動輒招尤而况腹劍森鋸舌  
簧瀉巧埋癡牀之媚骨朝露可哀奮債帥之老拳  
腥風未殄擠且下石惡將墜淵不忍一慙必遭再  
屈興其驚風濤於人海何如侶猿鳥於家山至若  
筐篋空如藥糧靡寄無財非病卽事多欣課兒孫  
讀古書揖父老聯朋話閉門種菜了無機心賣文  
爲活時有義取梦中躍馬猶聞殺賊之聲醉裏成  
詩漫寫憂時之語遲暮何感窮愁自珍不求人知  
大有事在是以鄉思益切生計無關白雲在天隨

旅鴈以俱北春水初漲趁江船其欲東曷云歸哉  
未之難矣惟是爵里已歸冗散去畱何足有無指  
故國以遄征其何能已辭大臣而長往未敢怱然  
幸鑿區區載陳縷縷形容垂老骨性非宜頓悟前  
非懇除名於例部冀收末路得稱善於鄉人祇候  
鈞批不勝悚惶迫切之至

謝官督部

某  
遵調來鄂幸獲屢謁鈞顏既雪巧誣竊聞溫訓  
仰挹休休之度深窺翼翼之誠感刻靡涯依馳倍  
切恭維宮保節相綱維化柄佐佑儲徽斗北星高

卷八

三十一

江流柱屹盛時謀帥必屬奇麗福艾之臣儒將握  
兵絕無智勇功名之迹眷隆心簡威戢牙璋籌皖  
豫數千里如磐石之安被湖湘十九郡以陽春之  
煦蹟參韓白譽茂溫陶四海具瞻百寮取則某叩  
辭後於二月二十三日舟返長沙卽奉宸批改交  
嚴議天地之於萬物雷霆亦寓生成父母之於子  
孫鞭撻尤應泣慕循衷省咎分所宜然方當待罪  
悚惶未及攄情瀆冒昨者南藩司擬委某提調代  
局稟候示遵俯賜允行特加獎借并有如能化傲  
性爲和平仍不失爲循良之吏之諭伏念某氣偏

剛拙材實迂愚一無可恃而何敢凌人有所不爲  
而但知守已徒以貢名蚤歲不無意興之高迨夫  
逐隊常階未暇學問之事愆尤遂集慚悔實多猥  
蒙槩獲之頒永矢韋弦之佩緬陶彭澤之飲酒聊  
復此生慨韓昌黎之釋言乃今知免亡羊補晚駕  
駑過前敢希往代之良能庶減末途之罪戾山田  
戢影此足爲善時涉世之方人海藏身古亦有慮  
滯戒冲之語砭鍼五內香火一生謹呈謝私伏乞  
勳鑒

致永順黃太守

卷八

二十三

不才承乏何幸逢君西山辰水之區多歷年所前  
賈後張之美彼何人斯久矣傾心行當識面敬維  
某官瓊林偉彥珠海名家縮五寸之竹符時方多  
事搢千年之銅柱功不自居葑屋蒙安戎亭罷警  
比者畫鼓餞臘形轡行春拜芝陛之殊榮班杏田  
之和氣允標準的翁受休嘉某敢易袁公飮聞杜  
母喜新尹必以告俾舊章以不愆俛繼芳塵益貞  
善教平沙枯草自憐百戰餘生明月愁心共話五  
溪往事

謝張巴陵

薦牘猥叨寵詞遠賁慰無故之淪屈喜將來之津  
梁拜竹慚增浣薇感切敬維某官祉繁酉孰績懋  
辰溼宴坐湖山埽邊烽而永靖朗吟風月騁逸興  
以遣飛獎能旌賢卽膺峻擢某幸還舊物已迫頽  
齡差同立誓沙門曾聞獅吼可笑罷粧老女又畫  
蛾眉自知碌碌因人仍望諄諄誨我肅裁布謝不  
盡區區

覆王清泉賀生日

商飆送秋庭樹不綠倦翮方戢朽齒徒增撫肅序  
以煩紆奉華賤之綺麗過蒙愛好且感且慚伏惟

卷八

二十四

明府五兄絜膳介祉鳴琴有暇聽采仁聲良用馳  
仰文琛比林類而何悔慕衛蘧之知非冀引桑榆  
之年讀書娛老難遂弧矢之志脫屣歸閑匆遽裁

答拜謝靡既

覆屬縣賀端午

幸共棠封久睽芝範承鸞箋之寵賁拜鶴餉以慙  
增卽維某官夏政因時虞弦助喜踵穎川之四長  
保艾興歌首綿竹於一州懸蒲布化恩綸五色壽  
縷千秋卜峻擢於朱陽慰翹私於丹款弟邊州暫  
攝令節重逢自知散櫟不材恰好及瓜而代四門

田假憶風味於當年一石舟輕栽雲根於到處

謝保舉開寶慶同知缺以知府儘先補用

日間接奉護鎮移開轉奉憲咨南路保舉奉旨署  
永州知府寶慶府同知黃文琛着開缺以知府禹  
於湖南儘先補用等因伏念文琛猥以疎庸謬權  
邊要涓埃未報兢惕方深而乃俯賜栽培曲加甄  
錄四郊多壘夫豈臣子望澤俸進之秋五事加階  
竟與朝廷念勤簡能之典光益上府已忝閑官師  
帥連城尤慚良守俾蠅附千里之尾因而至前抱  
鼇戴三山之心深知其重比者櫓薪載舉枹鼓仍

卷八

二十五

驚方完殘奮怯以何遑復櫛髮耨苗而未已遠聞  
旌旆飛來百戰之雄痛撫瘡痍定刷一方之恥佩  
竹符而滋懼望桂管以殷憂失之東隅逃矣西土  
所幸仰承高厚築訓頻頒惟期普賀昇平莽氛永  
息惟有益加勤慎時厯恩榮勉竭籌維期無隕越  
庶稍酬夫知遇實遙切夫瞻依所有感激下忱合  
肅具稟叩謝云云

謝克復興安保案行知

頃接行知粵西興安保案奉上諭黃文琛着賞加  
道銜黃敏鎔着以府經歷縣丞不論雙單月歸於

湖南遇缺卽補並賞戴藍翎欽此等因恭承紫渙  
感結丹忱顧慙光榮更逮愚藐仰維某官淵規潛  
運動福宏膺制心得虎闕之材扼喉除蟻固之患  
絳頭毛面翦滅一朝白羽鐵羣暗鳴九捷行見灑  
江而上效改襟脫帽之誠喜聞桂嶺以東無委粒  
遺芻之嘆膚功震疊擘畫周詳固宜冊拜豐褒器  
刊隆寄文琛五年邊要一介狷迂既宅生靜境之

未能復應手隨方以何有儲宏基之勇但躡賊踪  
伏行儉之兵幸憑地險曾無茂績敢冀橫恩威鳳  
九霄纔蒙口勅神羊一角又換心文被德獨優惕

卷八

二十六

躬罔措

兄子敘鎔

未學軍旅何知韜鈴當國家有

事之秋循子弟服勞之義鞞刀殺賊盾墨從戎方  
與拔山凌波爲徒凜以刻鵠畫虎相戒不任履屐  
忽忝簪纓家慶重增門基許荷逾涯難報鯨涉海  
而魂搖戴澤特殊鼉冠山而首重惟有慎勤益矢  
訓誡嚴加期菲材無負栽培俾小子允邀造就稍  
酬知遇曷禁瞻依謹瀝曲衷祇申寸稟云云

謝補永順府行知

頃奉札開以

卑府

題補永順府知府現准吏部知

照奉旨依議等因伏念

文琛

材本疎庸性尤戇拙

誤簡能於膠序忝逐隊於湖湘一綰邊符五更歲  
籥以不勝一匹雛之力固宜有三失伍之愆自分  
彈抨敢希甄敘乃蒙某官曲加標植俯賜包容憂  
國如家視屬吏直同子弟使人以器故枉材亦中  
鉤繩事雖瑣而周知勞以微而必錄昨聞騰奏倖  
邀嘉薦之登茲荷優遷喜拜真除之命夫何遭際  
能無愧顏言念艱虞不禁搔首江淮迄未底定獾  
獠頃復披猖久駐軍麾上厓廟算而五嶺頻來寇  
盜寸心獨切憂惶莽伏難除蔓滋可慮納降誠知  
其非策禦侮竊病其無能懸磬而炊空眷且戰虎  
無術使東渡蝗何時其西飛適玷階資曾無功狀  
矧永順引襟辰朗控帶巴黔狇鳥蠻花是施溶三  
州之舊地石田椎髻仍臙惹六洞之餘風窮嶂插  
天惡溪蕩日每憑險阻易動戈鋌更必慎擇夫良  
能庶足遠攝以威德一方謬領恐嬰覆餗之辜眾  
瘼胥蠲待報鳴絃之績恭承絳札敬署丹緘馬拳  
毛而長嘶敢云志存千里鼇冠首而仰戴深知恩  
重三山傾倒具陳刻銘靡既

謝交代局保案行知

頃奉行知交代局保舉奉上諭道銜補用知府黃

文琛着俟補缺後以道員補用欽此並准部咨俟  
繳足捐項送部引見時併案聲明等因伏念

文琛

法昧九章時延兩載勾稽粗畢疎舛仍多而乃俯  
賜裁成曲加埏埴使人以器枉材亦中鉤繩順事  
恕施百爾咸欽圭臬俾還故物已沛殊恩每循失  
伍之前愆敢慕退閑於曩哲正殷報稱未効涓埃  
豈意瑣微亦邀甄敘鳳啣丹詔荷九陛之恩濃黿  
立蒼波戴三山而感重惟是

文琛

管窺智小甕算

心勞衰謬無能久叨假豸騰驤有意未是真龍茲  
仍領夫竹符方殷憂於莽患愛民若子空懷保赤

卷八

二八

之誠憂國如家竊慚建白之績籌邊則才輸聚米  
實庫則術乏點金徒玷班資曾無治狀夫何遭際  
妄被寵榮一秩酬功六條弊吏輒撫躬而滋懼良  
引分以難安湘水南來阻清暉於九面嶽雲東望  
矢耿抱於一心惟有益切慎勤勉加駑策期無隕  
越刻凜鷓濡藉答高深稍酬知遇祗修寸稟謹瀝  
曲衷云云

謝胡明府惠鱗

忝膺支郡痛切疲人九月團臍忘老懷於此日一  
杯左手消狂態於當年籬菊自花霜橙欲綠殊孤

好景那復盛筵而况棚盜頻仍成烽警急雖云其  
細已甚乃敢橫行自如落角摧牙真滅此而朝食  
椎肥鳴圓期與子以偕行適辱嘉惠頒來知非行  
廚所有驚看活鱗喜得雄螯葦索都除瓦盆分貯  
荷重申之厚意兆解甲之吉占滿地干戈何處得  
此遺人箠笥卻之不恭我愧監州君能治事瘴鄉  
珍重更須五味和將饒守便宜不費一詩換得

謝椿司馬惠自鳴鐘

遠人貢獻會聞萬歷九年此物權輿不載檀弓一  
卷恭承珍貺伏讀琅函謹戰鼓以綏邊按短簫而

卷八

三九

告捷勢已竹破心與金同竊效樂歌先之勳器某  
遷延日月顛倒衣裳久如無睡之魚困支警枕不  
有知更之雀愁倚殘燈茲荷高情是真善禱機旋  
手鑰響應牙輪較銅滴而聲清視土圭而法巧庶  
幾夙夜與時偕行聽其鏗鏘有數可紀杳不知其  
所自天籟憑虛假於善者而鳴鬼工擅幻藉發深  
省爲報好音月罷城笳霜沈戍角我慚坐嘯居玉  
帳而衝疎子冑來過醉羽觴而漏永

永州城隍廟乞雨文

彌月不雨終風且霾此邦當鋒鏑之餘比戶無倉

箱之蓄恆收倘闕生計曷依默貢哀忱恭祈嘉澍  
惟神坊庸自古社稷同尊孚佑一方馨香百世奉  
牲奉醴未嘗禮儀有愆無麥無禾母亦靈爽所痛  
某謬權劇郡來撫災黎陽閉陰驕調和寡效男呻  
婦嘆安妥無方兵仍未休旱又大甚鞭乖龍使行  
水敢仗神威索老魑以焚林難循陋俗自維命分  
益切憂惶幸降康年懇邀昭鑿綠章騰奏天高高  
其可通白簡姑容考下下而自劾吏誠不職民有  
何辜速殃禍於眇躬以警尸位施和甘於卽日用  
甦疲氓

卷八

三

覆賀六十生辰啟

庚寅以降傷日月之不淹甲子已週辱泥塗其無  
悔幸延頽景甘謝浮榮本無當於時宜每深觀夫  
往代廉公健飯思用趙人新息據鞍難調從事不  
果退居之志殊乖知止之規損彼英聲憬予愚抱  
青山伴我姑暇日以優游白眼看人等浮雲之變  
幻陳編在手破硯隨身與魚鳥相交親以花月爲  
供養四節環轉暗催小劫之年一丹便仙笑卻長  
生之說茲逢初度乃荷高情寵以隆儀期之曼壽  
採虛名而勉其再出獎陋質而忘其不堪麟筆特

書誰記會戎之歲豸冠空戴久虛明法之家獨報  
衰顏莫關多口鷹條許脫燕幕且安瞻芳樹而思  
歸借小園而容住藉休荒旡免誚婆婆大樽不慮  
江湖自拙於用朝菌焉知晦朔以久特聞對使拜  
登裁箋肅謝永以爲好書不盡言

約同人春遊啟

微雨初晴好花乍放陽春召我勝賞宜人循柳子  
廟以東沂袁家渴而上溪山絕妙桃李最多短筇  
閑攜步履緩踏亦有小舟蕩槳不須列坐鋪氍毹  
水半篙白雲一縷林密不僻草柔亦香都籃滿貯  
嘉蔬大甕新分藏釀鮮鱗網得肥筍燒添佳處便  
與傾樽情來不妨拈韻婆婆老子跌宕吾曹噬旨  
同游先申此約

